

Headlines

1. मुखमन्त्री उमर अब्दुल्ला होरें आखेआ ऐ जे लद्दाख ते जम्मू-कश्मीर केंद्र शासित प्रदेश बश्कार संपत्तिएं, देनदारिएं ते दोआर-कर्जे दी युक्तिसंगत बंड सरबन्धी विषें गी गृह मंत्रालय अग्रे पुट्टेआ गेदा ऐ।
2. उमर अब्दुल्ला होरें जम्मू-कश्मीर प्रशासनिक सेवा JKAS दे विभागीय मतेयानें लेई स्लेबस गी मुकदा रूप दित्ता जा'रदा ऐ।
3. सकीना इत्तू होरें दस्सेआ ऐ जे कठुआ ते साम्बा जिलें च कोई 15 लक्ख कनाल जिमिएं परा नजैज कब्जे खाली कराए गेन।
4. सरकारै जानकारी दित्ती ऐ जे उद्योग कारखाने लगने ते इंडस्ट्रीयल इस्टेट लेई जिमियां पूरी चाल्ली नियमं कायदें मताबक गै लाट कीतियां जंदियां न।
5. मौसम विभाग नै अगले 24 घंटें दौरान हल्के कोला दरम्याने दर्जे दी बरखा ते बर्फबारी दी पेशगोई कीती ऐ-मौसम बारै यैलो अलर्ट बी जारी।

<><><><><><>

CM-MHA

जम्मू-कश्मीर दे मुखमन्त्री उमर अब्दुल्ला होरें अज्ज विधानसभा गी जानकारी दित्ती ऐ जे जम्मू-कश्मीर ते लद्दाख केंद्र शासित प्रदेश बनने दे बाद थमां इनें दौनें प्रदेशें च संपत्तिएं, देनदारिएं ते बजट गी पारदर्शी ढंगै नै बंडना यकीनी बनाने लेई इक कमेटी खडेरी गेदी ऐ। विधायक कैसर जमशेद लोन हुंदे आसेआ संपत्तिएं, देनदारिएं ते दोआर-कर्जे च सेही अनुपात च बंड बारै पुच्छे गेदे इक सोआलै दा परता दिंदे होई मुखमन्त्री उमर अब्दुल्ला होरें दस्सेआ जे आम प्रशासनिक विभाग दी अधिसूचना एस.ओ 339 जेड़ी 30 अक्तूबर 2020 गी जारी कीती गेई ही, दे मूजब इस सरबन्धै च प्रक्रिया जारी ऐ ते सार्वजनिक दोआर ते माली देनदारियां जेड़ियां जे 2 ज्हार 504 करोड़ 46 लक्ख रपे न, उनेंगी लद्दाख केंद्र शासित प्रदेश गी मुंतकिल कीता जा'रदा ऐ। उनें दस्सेआ जे एहू मामला गृह मंत्रालय अग्रे बी पुट्टेआ गेदा ऐ।

<><><><><><>

CM-JKAS

मुख्यमंत्री उमर अब्दुल्ला होरें अज्ज विधानसभा गी जानकारी दिती ऐ जे 2018 कोला लेइयै 2024 तगर दे जम्मू-कश्मीर प्रशासनिक सेवा यानि जे.के.ए.एस दे डिपार्टमेंटल यानि विभागीय मतेयानें दे स्लेबस गी मुकदा रूप देने दा कम्म अपनी खीरी गेड़ च ऐ ते एहदे मकम्मल होई जाने दे बाद जेकेएएस दे डिपार्टमेंटल मतेयान लेई लैते जांगन। विधायक एजाज अहमद जान हुंंदे इक जिमनी सोआलै दा परता दिंदे होई उमर अब्दुल्ला होरें मन्नेआ जे एहदे च चिर जरूर लगा ऐ जे हून एहू प्रक्रिया तोड़ चढ़ने दे कोलकाल ऐ। उनें दस्सेआ जे स्लेबस गी होरने राज्यें ते केंद्र शासित प्रदेशें कन्नै ते सीनियर आईएएस अफसरें कन्नै सलाह मन्वर करियै मिलियै तैयार कीता जारदा ऐ तां जे इसी राश्ट्रीय सतह दे मानकें मताबक बनाया जाई सकै।

<><><><><><>

Land-Retrived

अज्ज शिक्षा ते सेहत मंत्री सकीना इत्तू होरें आखेआ जे साम्बा ते कठुआ जिलें च गैर कनूनी तौरा पर कब्जाई गेदी कुल 17 लक्ख 27 ज्हार 241 कनाल ते 8 मरले जमीन चा 15 लक्ख 39 ज्हार 662 कनाल ते 15.5 मरले जमीन छुड़ाई लैती गेदी ऐ। मंत्री सकीना इत्तू होरें मुख्यमंत्री उमर अब्दुल्ला हुंदे आसेआ राजीव जसरोटिया हुंदे सवाल दे परते च एहू जानकारी दिती। उनें इब्बी आखेआ जे जमीनां छुड़ाने दी प्रक्रिया जारी ऐ ते बची दी 3 लक्ख 13 ज्हार 645 कनाल ते 12 मरले जमीन जेदी कीमत 18 ज्हार 49 करोड़ 60 लक्ख ऐ, उसी बी तौले गै छुड़ाई लैता जाग। मंत्री होरें जानकारी दिंदे होई आखेआ जे गैर कनूनी कब्जें आहली जमीन गाटी पटरवार, पटवार हल्का नानन, फोरलेन, पगताली पटवार, तारफ बजवाल, मंजली थाहरें थमां छुड़ाई गेदी ऐ। तोआई, कौरपुन्नू साम्बा च कुसै बी सरकारी जमीन उप्पर गैर कनूनी तरीके कन्नै कब्जा नेई कीता गेदा ऐ।

<><><><><><>

Safai-Karamchari

जम्मू-कश्मीर सरकार नै अज्ज गलाया ऐ जे बक्ख-बक्ख शैहरी इलाकें च कम्म करने आहले सफाई कर्मचारियें दे नियमतिकरण दी जांच उस समिति दे राएं कीती जाग जेड़ी अस्थाई कर्मचारियें दे नियमतिकरण आस्तै बनाई गई ऐ। एहू गल्ल सेहत मंत्रालय दी मंत्री सकीना इत्तू होरें मुख्यमंत्री उमर अब्दुल्ला हुंदे आसेआ भरत भूषण हुंदे सवाल दे परते च आखी। उनें आखेआ जे जम्मू-कश्मीर दे बक्ख-बक्ख शैहरी इलाकें च 7 ज्हार 353 सफाई कर्मचारी कम्म

करा'रदे न' जिंदे च कई सारे ऐसे न जिनेंगी कम्म करदे होई 10-15 बरे होई गेदे न ते ओह पक्के होई गेदे न ते इन्दे किश गै कर्मचारी रेई गेदे न जेडे कैजुअल कर्मचारी ना।

<><><><><><>

Sports-Minister

युवा सेवाएं ते खेड्डें दे राज्यमंत्री सतीश शर्मा होरें अज्ज आखेआ ऐ जे अखनूर हल्के च मकामी युवाएं आस्तै कई खेड्डु सरबंधी सुविधां आंदी गेदियां न। मंत्री होरें विधानसभा च मोहन लाल हुंदे राएं कीते गेदे सुआलें दे परते च एहू गल्ल आक्खी। उनें इब्बी आखेआ जे अखनूर दा इनडोर स्टेडियम ठीक बवस्था च ऐ ते खरी चाल्ली कम्म करारदा ऐ ते उत्थे दे डिग्री कालेज दे स्पोर्ट्स स्टेडियम च बी हाल च गै वीआईपी बैठक ते बाकी लोकें आस्तै बैठकें दी जगहें समेत खेड्डुने आस्तै कोई बनाए गेन कीजे मैदान च बैठने आहला उप्परी ढांचा तबाह होई गेदा हा।

<><><><><><>

Udh.-Kidney Days

सरकारी मेडिकल कॉलेज उधमपुर दे आसेआ अज्ज अस्पताल दे अंदर गै विश्व किडनी दिवस यानि गुर्दे सरबंधी कुल संसारी ध्याड़ा मनाया गेआ। जीएमसी उधमपुर च इस ध्याड़े दा विशेसार हा "Are your kidneys ok? Detect early, protect kidney health" यानि अपने गुर्दे दा पता लोआओ ते एहदी रक्षा करो। एहू ध्याड़ा हर बरे मार्च म्हीने दे दुए वीरवार गी मनाया जंदा ऐ ते एहदा मकसद पूरी दुनिया च गुर्दे दी बमारी गी लेइयै जागरूकता पैदा करना ऐ। इस मौके पर कई सारे प्रो. ते सहायक प्रो. शामिल हे, जिनें बक्ख-बक्ख गुर्दे दी बमारियें बारै लोकें गी जागरूक कीता ते इन्दे कोला बचा आस्तै उपाऽ दस्से।

<><><><><><>

Industrial-Estate

सरकारै अज्ज एहू साफ कीता ऐ जे कोई बी औद्योगिक खेत्तर जिसी इंडस्ट्रीयल एस्टेट आखेआ जंदा ऐ, गी विकसित करने लेई जिमी मैहकमा माल आसेआ उद्योग ते बपार मैहकमे दु सुपुर्द कीती जंदी ऐ ते मैहकमा उद्योग गै उसी तयशुदा नियमें ते प्रक्रियाएं दी बिनाह पर अपना उद्योग धंधा शुरू करने आहले उद्यमिएं गी अगगे अलाट करदा ऐ, एहू जानकारी मुख्मन्त्री उमर अब्दुल्ला होरें अज्ज मीर सैफउल्लाह हुंदे आसेआ बक्ख-बक्ख फर्में, कंपनिएं ते लोकें गी पिछले 2 बरें दौरान जम्मू-कश्मीर च अलाट कीती गेदिएं जिमिएं दे बारे च पुच्छे गेदे इक जिमनी सोआल

दा परता दिंदे होई सांझी कीती। एहदे शा पैहले मंत्री सकीना इत्तू होरें मुखमंत्री जिंदे कश मैहकमा माल दी जिम्मेवारी बी ऐ, उंदी तरफा सोआलै दा जवाब दिंदे होई सदन गी भरोसा दोआया जे बक्ख-बक्ख थाहरें अलाट कीती गेदियां जिमियां, पालसी प्रावधानें ते नियमें दी पूरी चाल्ली पालमा करदे होई गै दित्तियां गेदियां ना।

<><><><><><>

LA-Zero Hour

जम्मू-कश्मीर विधानसभा च अज्ज शून्य काल दौरान मिम्बरें आसेआ कई सारे मुद्दे पुट्टे गे जिंदे चा ज्यादातर केंद्र शासित प्रदेश च प्रशासन दे कम्में ते जनता दे हितै कन्नै जुड़े दे हे। आकाशवाणी दे जम्मू संवाददाता नै जानकारी दित्ती ऐ जे अज्ज सदन दी कार्रवाई कुलगाम थमां विधायक एम.वाई तारीगामी जेड़े जे इक बड़े सीनियर ते तजुर्बेकार विधायक न ते कन्नै सदन दी कार्रवाई गितै बनाए गेदी सलाहकार कमेटी दे बी मिम्बर न, उन्दे आसेआ इक विधायक आसेआ पुट्टी गेदी चिंता गी दूर करने लेई उन्दे परते कन्नै होई। तारीगामी होरें साफ कीता जे जम्मू-कश्मीर पुर्नगठन कनून 2019 मूजब स्पीकर कश विधायी मामले च विजन कुसै बाहरी सलाह दे फैसले लैने दा हक ऐ। पाम्पोर थमां विधायक जस्टिस रिटायर्ड हसनैन मसूदी होरें ककपोरा च रेलवे क्रासिंग पर जिमी हेठा लंग्घने लेई अंडरपास गी बंद दा मुद्दा पुट्टेआ। एहदे अलावा पट्टन थमां एम.एल.ए जावेद रिआज बेदार होरें उपजिला अस्पताल पट्टन च अनिस्थीसिया दा माहिर डॉक्टर उपलब्ध नेही होने दा मुद्दा पुट्टेआ। उन्दे अलावा बी होर कई मिम्बरें बक्ख-बक्ख चाल्ली दे सोआल पुच्छे जिंदा सदन च परता दित्ता गेआ।

<><><><><><>

Kathua Canteen

कठुआ दे महिलाएं दे कालेज च इक्क दीदी की रसाई ना दी कंटीन दा उद्घाटन कीता गेआ। एहदा उद्घाटन समारोह उत्थूं दे जिला शैहरी विकास एजेंसी दे प्रोजेक्ट अफसर जफर अब्बास ते कालेज दे वाइस प्रिंसिपल हुंदी मौजूदगी च होआ। एहू कंटीनी प्रणवी नां दे स्वयं सहायक समूह आसेआ चलाई गेदी ऐ ते एहू समूह दीनदयाल अंतोदया योजना राश्ट्र शैहरी आजीविका मिराज दे हेठ कम्म करदा ऐ ते एहदे च घट्ट मुल्लें उप्पर घरै जनेई बनी दी रूट्टी बनदी ऐ। इस पैहलकदमी कन्नै दो मकसद पूरे हुंदे न, इक्क ते स्वयं सहायक समुदाएं दी महिलाएं गी आमदनी मिलोग ते दुआ कालेज दे विद्यार्थिं ते बाकी अमले गी पौष्टिक खान-पान मिलोग।

<><><><><><>

Weather

हफ्ताभर बरखा रौहने आहली पेशगोई दे चलदे मौसम विभाग नै अज्ज आस्तै येलो अलर्ट जारी कीता ऐ। आकाशवाणी जम्मू दे संवाददाता हुंदी रिपोर्ट मूजब 10 मार्च मगरा किश थाहरें पर बरखा होई। इयै जेया मौसम 16 मार्च तगर बने दा रौहग। मौसम विभाग नै अज्ज लेई कई थाहरें आसतै येलो अलर्ट जारी कीता ऐ। कई थाहरें पर हल्की थमां दरम्याने दर्जे दी बरखा होई ऐ। 15 मार्च तगर मेद ऐ जे कइयें सारी थाहरें पर हल्की बरखा ते बर्फबारी होई सकदी ऐ ते 17 थमां 21 मार्च तगर आम तौर पर मौसम खुशक रौहग।

<><><><><><>